

Utoqqalinersiaqarnek pillugu Namminersorlutik Oqartussat nalunaarutaat

Utoqqalinersiaqarnek pillugu Inatsisartut inatsisaat nr. 20, 23. november 2015-imeersumi § 13, imm. 5, § 17, imm. 7 naapertorlugit aalajangersarneqarput:

Aningaasaqarnikkut tapit

§ 1. Pissutsini ataasiakkaani nalilersuereernikkut aningaasaqarnermut tapimik tamakkiisumik ilaannakortumilluunniit ukununga matussusiinissamut kommunalbestyrelsi akiliuteqarsinnaavoq:

- 1) ineqarnermut akiliummut aningaasartuutitut,
- 2) imermut, innaallagissamut, kiassarnermut, eqqakkanut, uuliamut il.il. aningaasartuutitut, aamma
- 3) pinasuartumik aserfallatsaaliuinnermut pisariaqartumut, pinasuartumik iluarsaassinernut pisariaqartunut imaluunniit kiassaatinik uuliatortunik pinasuartumik taarsersuinnernut pisariaqartunut il.il.

Imm. 2. Utoqqalinersiaqartumut aningaasaqarnikkut immikkut ittumik ajornartorsiuteqartumut imaluunniit utoqqalinersiaqartup aningaasaqarnikkut annertuumik ajornartorsiuteqalernissaa ilimanaateqarpat aningaasaqarnermut tapeq aatsaat tunniunneqarsinnaavoq.

Imm. 3. Aningaasatigut tapeqarnissamik qinnuteqaatip nalilersornerani immikkut aamma aningaasaqarnikkut immikkuullarissumik utoqqalinersiallit allat atugaannik allaanerusumik utoqqalinersiallip atugaqarnera kommunalbestyrelsip ilaatigut pingaaruteqartutut isiginiarsinnaavaa. Aapparissamut imaluunniit nalunaarsukkamik inooqatigisamut pilersuisussaataaneq taamattaq pingaaruteqartutut isiginiarneqarsinnaavoq.

Imm. 4. Aningaasatigut tapeq ataasiartamik tapitut tunniunneqassaaq. Pissutsini immikkuullarissuni aningaasatigut tapeq piffissami qaammatit pingasukkaartumik sivisunerpaamik sivisussusilerneqartumut tunniunneqartarsinnaavoq.

Imm. 5. Aningaasatigut tapeqarnermut aalajangiinnermi allassimasassaaq utertitsilluni akileeqqusisoqassanersoq imaluunniit utertitsilluni akileeqqusinertaqanngitsumik tunniussisoqarnersoq.

§ 2. Illup, biilit, angallatip il.il. pitsanngorsarnissaannut imaluunniit aserfallatsaaliornissaanut eqqarsaatigineqartumut aningaasartuutitut matussutissatut aningaasaqarnermut tapeq tunniunneqarsinnaanngilaq.

Tapit aningaasanit atorsinnaasanit aalajangigaasut

§ 3. Aningaasat nammineq atorsinnaasat annertussusissaat najukkami inuuniarnermut tunngasut isiginiarlugit kommunalbestyrelsimit aalajangersarneqassapput.

Imm. 2. Aningaasat nammineq atorsinnaasat tassaapput utoqqalinersiaqartup isertitai maanna atuuttut akileraarusererlugit, aamma aningaasartuutit makku ilanngaatigereerlugit sinneruttut:

- 1) Nammineq najugarisamut aningaasartuutit imaluunniit inissiani attartortittakkani ineqarnermut akiliutit ineqarnermut tapiissutit ilanngaatigereerlugit.
- 2) Imermut, innaallagissamut, kiassarnermut, eqqakkanut, uuliamut il.il. aningaasartuutit.

Imm. 3. Aningaasanut atorsinnaasanut aalajangikkamik tapinut tunngavigineqartut allannguuteqarpata, tunngavigisani allannguuteqarneq utoqqalinersiuteqartup atorsinnaasaasa aningaasartaasa allanngornerinik malitseqarpat, utoqqalinersiallip aningaasani atorsinnaasaani aalajangikkamik tapiliunneqartut iluarsineqassapput.

Paaqqinnittarfinni il.il. angerlarsimaffiup avataani inissisimaneq

Isumaginninnermi ulloq unnuarlu paaqqinniffimmiinnermut nammineq akiliuteqarneq

§ 4. Utoqqalinersiaqartoq nammineq isertitaqarpat isumaginninnermi ulloq unnuarlu angerlarsimaffimmiinnermut tamakkiisumik ilaannaasumilluunniit akiliitsisoqassaaq. Akiliutissaq akileraaruteqareernermi utoqqalinersiat saniatigut nammineq isertitaasa 60 procentianit annertunerusinnaangilaq.

Imm. 2. Aningaasartuutinut utoqqalinersiuteqartup isumaginninnermi ulloq unnuarlu angerlarsimaffimmiinneranut toqqaannartumik attuumassuteqartunut taamaallaat akiliitsisoqarsinnaavoq.

Pisortat paaqqinniffutaanniinnermi utoqqalinersianit ilanngaassisarneq.

§ 5. Pisortat paaqqinniffutaanniinnerup nalaani kaasarfimmiut, akissarsiat imaluunniit pisortani oqartussanit sammisassaqtitsinermit akissarsiat utoqqalinersianit ilanngaatigineqassapput. Taamaattoq ilanngaassereernerup kingorna utoqqalinersiaqartoq utoqqalinersiat tunngaviusumik aningaasartaasa minnerpaamik 46 procentiisut annertussusilinnik aningaasaateqartinneqassaaq.

Naammagittaalliorsinnaaneq

§ 6. Aalajangiinerit nalunaarut manna malillugu aalajangiiffigineqartut isumaginnittoqarfiup aqunneqarnera aaqqissuussaaneralu pillugit maleruagassat sukkulluunniit atuuttut malillugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

Atuutilernera

§ 7. Nalunaarut ulloq 1. januar 2022 atuutilerpoq. Peqatigisaanik utoqqalinersiaqarneq pillugu Namminersorlutik Oqartussat nalunaarutaat nr. 21, 29. december 2015-imeersoq atorunnaarsinneqarpoq.

Namminersorlutik Oqartussat, ulloq 23. decembari 2021

Mimi Karlsen

Isumaginninnermut, Sulisoqarnermut, Nunamullu Namminermut Naalakkersuisoq

/ Isak Nielsen Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut